

MTUMISHI WA MUNGU LUISA PICCARRETA

YESU MTESEKA ALIVYOONEKANA NA ALIVYOJIFUNUA KWAKE

(Tazama katika *‘Saa 24 za Mateso ya Bwana Wetu Yesu Kristo’*)

SAA YA PILI: (Taz. Uk 7-9). Kutoka Kitabu cha 12: Tarehe 28 Nov. 1920

Kabla ya Mateso Yesu Anataka Akambariki Mama Yake

Luisa anasema:


Nilikuwa nikitafakari juu ya mpango wa Yesu Wangu Mtamu wa kwenda kwa Mama yake ili kumwomba baraka yake kwa ajili ya kuingia katika Mateso yake makali. Na ndipo Yesu Mtukufu aliniambia:

“Binti yangu, ni mambo mangapi yanayoonekana katika fumbo hili? Mimi nilitaka kwenda kuomba baraka kwa Mama yangu mpenzi ili kumpatia fursa na Yeye aweze kuniomba baraka. Mateso ambayo alipasika kuyakabili yalikuwa ni mengi mno na kwa hiyo ilikuwa ni vema kabisa aimarishwe kwa baraka yangu. Ni mazoea yangu kwamba pale ninapotaka kutoa kitu, papo hapo na mimi naomba kitu. Na Mama yangu alinieleva mara kwa vile hakunibariki kabla ya yeye kuniomba Mimi baraka yangu na baada ya yeye kubarikiwa nami ndipo tu na yeye alinibariki Mimi.

Lakini si jambo hilo tu: Pale nilipoumba ulimwengu nilitamka ‘Fiat’ na ndivyo hivyo kwa kauli ya ‘Fiat’ tu niliumba upya na kunakshi mbingu na dunia. Na pale nilipomuumba binadamu, ni pumzi yangu yenye enzi ndiyo iliyomwingizia uhai ndaniye. Ninapoingia kuanza Mateso yangu nilitaka nimbariki Mama yangu kwa neno langu lenye enzi na uwezo wa uumbaji. Lakini sikuwa nikimbariki yeye peke yake.

Ndani ya Mama yangu nilikuwa nawabariki viumbe wote. Yeye alikuwa akishika nafasi ya kwanza juu ya wote na kwa hiyo kupitia kwake nilibariki vyote na kila kitu, yaani, kila wazo, kila tendo, kila neno nk. Nilikuwa nabariki kila kitu ambacho kitapasika kumsaidia kiumbe kama vile ‘Fiat’ yangu yenye enzi ilivyoliumba jua ambalo, pindi jua hilo linapofanya mwendo wake, kamwe lisipunguze mwanga wala joto lake bali liwe kwa manufaa ya wote na kwa kila mwenye uhai. Kwa jinsi hiyo neno langu la uumbaji lilipobariki lilibaki na nguvu yake ya kubariki kwa daima, bila kukoma kubariki kama vile jua halitakuja kukoma kutoa mwanga wake kwa viumbe vyote.

Na bado siyo yote: Kwa baraka yangu nilinua kurekebisha na kurejesha hadhi na heshima ya vilivyoubwa, nilinua kumwita Baba yangu wa Mbinguni aje kubariki ili afikisha Hekima na Pendo kwa kiumbe. Kwa njia hiyo nilinua kurejesha nguvu ya kumbukumbu, ya akili na ya utashi kwa kiumbe na hivyo kumwezesha awe tena na mamlaka juu ya vitu vyote. Nilijua lakini kuwa kwa kutoa baraka na mimi ninataka baraka. Na Mama yangu mpenzi alilieleva hilo, akanibariki mara, siyo kwa niaba yake tu, bali alinibariki kwa niaba ya wote.



Oh! Laiti watu wote wangefaulu kuiona hiyo baraka yangu, wangeionja katika maji wanayokunywa, katika moto wanaoota, katika chakula wanachokula, katika teso linalowapata, katika vilio vya sala, katika fadhaa ya makosa, katika kuachika na viumbe. Katika hayo yote wangukuwa wanalisisikia neno langu la uumbaji linalowaambia, hata kama kwa bahati mbaya hawalisisikii: ‘Ninakubariki kwa jina la Baba na la Kwangu, na la Roho Mtakatifu. Ninakubariki ili nikusaidie, nikutetee, nikusamehe, nikutulize, na ili nikufanye uwe mtakatifu’. Na kiumbe angetoa jibu kwa baraka zangu hizo kwa tendo la yeye mwenyewe kunibariki mimi katika kila kitu. Hayo ndiyo matokeo ya baraka yangu. Ndani ya baraka hiyo, Kanisa langu lililofundishwa nami linaendeleza baraka mbalimbali. Yaani, karibu katika mazingira yote, linatoa baraka yake katika maadhimisho ya Sakramenti na katika maadhimisho mengine”.

SAA YA NNE: (*Taz. Uk 16 -23*). Kutoka Kitabu cha 11:

Tarehe 8 Septemba 1916

Yesu anajikominisha Yeye Mwenyewe

Luisa anaandika:

Leo asubuhi, baada ya Komunyo, nililikuwa naonja kuwa Yesu Mpendwa wangu, kwa nguvu ya pekee alikuwa anaivutia na kuizamisha nafsi yangu yote ndani ya Utashi wake na mimi nikajikuta ninaogelea ndani ya Utashi huo wake. Hata hivyo ni nani anayeweza kuelezea kile nilichokuwa naonja? Sina msamiati wa kuweza kujielezea! Na Yesu akaniambia:

“Binti yangu, kwa kipindi chote ambapo roho inakaa ndani ya Utashi wangu, ndivyo kiumbe hicho kinaishi uhai wa kimungu hapa duniani. Ni jinsi gani inavyonipendeza Mimi pale ninapona roho inaingia ndani ya Utashi wangu ili kuuishi uhai wa kimungu! Inanipendeza kabisa kuona roho mbalimbali zikirudia kutenda ndani ya Utashi wangu mambo yale yale yaliyotendeka na Ubinadamu wangu ndani ya huo Utashi.

Nilipoiweka Sakramenti ya Ekaristi Takatifu, na nilipowakominisha Mitume, Mimi nilijikominisha nafsi yangu Mimi mwenyewe ndani ya Utashi wa Baba. Kwa kufanya hivyo, si tu nilikuwa nalipa fidia ya yote, lakini pale katika Utashi wa Mungu, nilipokuta uwingi mkuu wa vitu vyote na watu wote, na nilipoweza kuona yote wazi kabisa, ndipo nilikuwa ninawakumbatia wote na niliwakominisha wote. Na ilipoonekana kuwa wengi wasingaliweza kuishiriki Sakramenti, na kwamba Baba alikuwa amesikitishwa kuona wapo ambao hawakutaka kupokea uhai wa kimungu, Mimi nililipa malipizi kwa Baba na nilimtolea utukufu sawa kama vile watu wote wangukuwa wamepokea Komunyo Takatifu. Kwa niaba ya kila mmoja Mimi nilimtolea Baba fidia na utukufu wa uhai wa kimungu.

Na wewe pia, pokea Komunyo katika Utashi wangu, rudia kutenda kile nilichofanya mimi, na kwa njia hiyo siyo tu utalipa fidia kwa yote, bali utanichukua na utanigawa Mimi mwenyewe kama Komunyo kwa wote kama vile nilivyokuwa kujitoa kwa wote. Ndivyo utakavyonipatia utukufu sawa kama vile wangukuwa wamekominika wote.

Moyo wangu unajisikia kulainika pale ninapona kuwa kiumbe, kisichoweza kunipatia chochote kilicho cha kwake na chochote chenye kustahilika mbele yangu, kinachukua vitu vyangu na kuvifanya vya kwake, kinaniiga jinsi nilivyotenda mimi, na inavitoa kwangu ili kunifurahisha. Na mimi, katika furaha yangu naendelea kuvirudiarudia. Pongezi sana kwako binti yangu, umetekeleza vema kabisa kile ambacho nilikuwa ninakitenda mimi”.

SAA YA NNE: *Kutoka Kitabu cha 12:*

Tarehe 24 Oktoba 1918

Yesu Alisambaza Uhai Wake Wote Ndani ya Kila Hostia

“Binti yangu, ili kumfanya kiumbe aweze kupata njia zote za lazima kwa ajili ya kunipokea mimi, niliamua na nilipenda kuweka Sakramenti hii iliyo ya mwisho katika uhai wangu, ili niweze kusambaza uzima wangu wote ndani ya kila Hostia kama kitu ninachoandaa kwa ajili ya kila kiumbe kitakachoweza kunipokea. Na kiumbe kisingeweza kunipokea kama pasingekuwapo na Mungu mwandalizi ambaye alishikwa na ukali wa upendo wa kutaka kujitoa mwenyewe kwa kiumbe. Na kwa vile kiumbe hakuweza kunipokea, ule ule ukali wa upendo wangu ulinisukuma kutoa uzima wangu wote kwa ajili ya kukiandaa kiumbe hicho. Kwa hiyo nilikuwa namwekea hatua zangu, matendo yangu na pendo langu kando yake kiumbe huyo. Na kwa vile ndani yangu kulikuwepo pia Mateso yangu, nilimwekea hata maumivu yangu ili kumwandaa”.

SAA YA TANO HADI SAA YA SABA: *(Taz. Uk 28 – 49). Kutoka Kitabu cha 9: Tar 4 Julai 1910*

Saa Sita za Mateso Makali ya Yesu



Luisa alisema:

Wakati nikiendelea na hali yangu ya siku zote ya kukosa sana mahitaji na ya maumivu, nilikuwa natafakari juu ya Mateso makali ya Bwana wetu, naye Bwana aliniambia:

“Binti yangu, kwa namna ya pekee nilitaka niyapate Mateso makali ya Bustanini ili niwasaidie wale wote walio kufani wapate kifo chema. Tazama vema jinsi Mateso yangu makali yanavyounganika na kuhusika na mateso makali ya wakristo: uchovu, uchungu, masikitiko, na jasho la damu. Nilikuwa nasikia vifo vya wote na vya kila mmoja wao, nilijisikia ninakufa kwelikweli kwa ajili ya kila mtu binafsi, na hivyo ndani yangu nilionja uchovu, uchungu, na masikitiko ya kila mmoja wao. Kwa wote hao niliwapatia misaada yangu, vitulizo vyangu na matumaini. Basi, kama vile nilivyokuwa naonja vifo vyao ndani yangu, ndivyo na wao waliweza kujipatia neema ya kufa wote ndani yangu huku wakijikuta wakiwa ndani ya ile pumzi moja tu ya kwangu na hatimaye niliweza kuwabariki mara kwa nguvu ya Umungu wangu.

Iwapo Mateso makali ya Bustanini yalikuwa hasa kwa wale walio mahututi, Mateso makali ya msalabani yakawa msaada katika dakika ya kukata roho, yaani hasa katika pumzi ya mwisho. Yote mawili ni Mateso makali, lakini kila moja ni tofauti na lingine. Mateso makali ya Bustanini yalijaa uchungu, hofu, mahangaiko na wasiwasi, vitisho na kuogopa. Mateso ya msalabani yalijaa amani na utulivu usioweza kuvurugwa.

Na nilipolia ‘Naona Kiu’, ilikuwa ni kiu kisichokoma cha kutaka watu wote waweze kufa ndani ya pumzi yangu ya mwisho. Na nilipoona wengi wakitorokea kwenda nje ya pumzi yangu ya mwisho, kwa maumivu sana nililia: ‘Naona kiu’. Na kilio hicho ‘Naona Kiu’ huendelea bado kusikika ndani ya watu wote na kwa kila mmoja kama kengele ya mlangoni pa kila moyo, kengele inayosema: ‘Nina Kiu na wewe ewe roho, dah! Usitorokee nje yangu, bali ingia ndani yangu ili upumue pamoja nami’.

Kwa hoja hiyo ziko saa sita za Mateso yangu ambazo nilizitolea kwa ajili ya watu kusudi wapate kufa vema. Saa tatu za Bustanini zilikuwa ni msaada wakati wa mahangaiko makali, yaani wakati wa mahututi, na saa tatu za msalabani ni msaada katika pumzi ya mwisho ya kifo. Baada ya hilo lote, je ni nani sasa asiyeweza kukiendea kifo kwa tabasamu? Zaidi zaidi ni tabasamu kwa yule anayenipenda na yule anayetamani kujitoa sadaka juu ya ule ule Msalaba wangu.

Ebu ona jinsi kifo kilivyo kizuri! Na ni jinsi gani mambo hubadilika! Maishani nilidharaulika, hata miujiza yangu haikuzaa matunda ya kifo changu, na hata nikiwa msalabani walinidhalilisha kwa matusi. Lakini kumbe mara nilipotoa pumzi ya mwisho tu, kifo kilipata nguvu na uwezo wa kubadili mambo: Wote walijipiga kifua wakiniikiri na kuniungama kuwa Mwana kweli wa Mungu. Wafuasi wangu wenyewe walipata ujasiri, na wale wafuasi wa siri siri waliwashwa moto na wakaomba Mwili wangu na kunifanyia mazishi ya heshima. Mbingu na dunia, nazo kwa sauti kuu, zinaungama kuwa Mimi ni Mwana wa Mungu. Kifo ni kitu kikuu cha thamani na cha hadhi tukufu.

Na ndicho hutokea pia kwa ajili ya wana wangu wenyewe wanaodharaulika, kubezwa na kudhulumwa na kuonewa katika maisha. Zile fadhila zenyewe ambazo zilitakiwa zitoe mwanga ili kuwaangaza watu wanaowazunguka huwa zinabaki nusu zimefunikwa. Ushujaa wao katika kuteswa kwao, kujikatalia nafsi zao, ari yao kwa ajili ya roho za watu, vimepeleka mwanga na pia mashaka kwa watu wanaowazunguka. Na Mimi hata hivyo nimeruhusu vifuniko hivyo vya mashaka vitokee ili kuhifadhi fadhila za wana wangu wapenzi katika uhakika na uthibiti zaidi.

Lakini mara wanapokufa, vifuniko hivyo huwa naviondoa kwa vile huwa siyo vya lazima tena. Hapo yale mashaka hugeuka sasa kuwa uhakika unaokubalika, ile nuru sasa huangaza wazi zaidi, na nuru hiyo hupelekea kuthamini ule ushujaa wao. Sasa watu hutoa heshima kwa kila kitu na hata kwa mambo mengine madogomadogo. Kwa namna hiyo, kile ambacho mtu kashindwa kutekeleza wakati wa uhai, sasa huongezwa na kuhitimishwa na kifo. Na iwe kwa kile kinachotokea hapa au kwa kile kinachotokea kule, kila kimojawapo huwa kinavuta na kupendeza ajabu na kutamaniwa hata kuonewa wivu na watu wote kabla ya kufa kwao”.

SAA YA TANO: (*Taz. Uk 28–31*). *Kutoka Kitabu cha 12:*

Tarehe 4 Februari 1919

Kile Kilichofanya Umungu Uteseke Katika Ubinadamu wa Yesu

“Binti yangu, hata mwiba mmoja na hata msumari mmoja havikuachwa pembeni au kusahaulika. Kila kimoja cha hivyo kiliumiza sana Ubinadamu wangu uliokuwa ukilalamika na Mateso. Lakini si miiba wala si misumari au mijeledi ile iliyoniumiza katika Mateso yale waliyonitendea viumbe, kwani hiyo haikuwa inajiongeza au kujizidisha. Idadi waliyonitia au kunipigilia ilibaki daima hiyo hiyo. Kumbé lakini ile miiba, misumari na mijeledi ya Umungu wangu ilikuwa inajiongeza na kujizidisha katika kila tusi na kila dhambi au kosa walilonitendea.

Yaani basi idadi ya miiba kulingana na idadi ya mawazo mabaya, idadi ya misumari kulingana na idadi ya matendo mabovu, idadi ya mapigo ya mijeledi kulingana na idadi ya tamaa mbaya, idadi ya maumivu kulingana na madhambi mbalimbali. Kwa hiyo nilipata mabahari ya maumivu, miiba, misumari na mapigo yasiyohesabika.

Teso walilonitendea viumbe katika siku ya mwisho ya maisha yangu halikuwa kitu cha pekee bali lilikuwa ni kivuli tu na mfano tu wa maumivu yale ambayo Umungu wangu ulinitendea katika Ubinadamu wangu kipindi chote cha maisha yangu”.

SAA YA TANO: *Kutoka Kitabu cha 9:*

Tarehe 25 Novemba 1909

Jinsi Pendo la Milele Lilivyomtesa Yesu Ndani ya Moyo Wake

“Binti yangu, katika Mateso yangu binadamu hawakunitendea kitu zaidi ya kuutesatesa Ubinadamu wangu, wakati lakini Pendo la milele lilikuwa linanitendea Mateso yote kwa ndani. Ni hivyo kwamba katika maumivu yangu makali sana, hawakuwa hasa ni binadamu walionitesa zaidi, bali ilikuwa ni Pendo la milele, Pendo Kuu ajabu, Pendo lisilohesabika wala kupimika, Pendo lililofichikana, ndilo lilinisababishia madonda makubwa, ndilo lilinitoboa kwa misumari ya moto, ndilo lililonivalisha taji la miiba inayounguza na ndilo lililoninywesha nyongo inayochemka moto.

Kutokana na hali hiyo, Ubinadamu wangu myonge haukuweza kustahimili madhulumu hayo yote kwa wakati moja: basi mwili ulipasuka na kuanza kutiririsha mito ya Damu, ulivimba na kupinda na ndipo nikafikia kusema: ‘Baba, ikiwezekana, kikombe hiki uniondolee mbali, lakini isiwe kadiri ya Utashi wangu mimi bali Utashi Wako ufanyike’. Kitu hicho sikufanya katika Mateso yaliyofuata baadaye.

SAA YA SITA: (*Taz. Uk 34 – 38*). Kutoka Kitabu cha 13:

Tarehe 19 Novemba 1921

Mateso ya Yesu Pale Bustanini Yalikuwa Makali na Magumu

Yesu asema kwa Luisa:

“Binti yangu, Mateso yangu pale Bustanini yalikuwa magumu na makali kweli; makali zaidi kupita hata yale ya msalabani. Na ni kwa hoja hii: Pale msalabani ilikuwa ni hitimisho na ushindi wa kila kitu, lakini hapa Bustanini ilikuwa ni mwanzoni mwa mambo. Ni kawaida mabaya huonjeka zaidi yanapoanza kuliko pale yanapomalizika. Lakini katika Teso hili la mwanzoni maumivu yaliyonitesa zaidi yalikuwa ni pale ambapo dhambi zote zilionekana na kupita mbele ya akili yangu moja baada ya nyingine. Ubinadamu wangu ulizitambua zote na kuuelewa ukuu na ubaya wote wa dhambi hizo. Na kila uhaini na uhalifu ulipita mbele yangu huku kukiwa na bango lililoandikwa: ‘Kifo kwa aliye Mungu’ na mkononi kulikuwa na upanga mkali wa kuniulia mimi mbali. Mbele ya Umungu wangu kila kosa lilionekana kuwa chafu, bovu na la kutisha kabisa kabisa kuliko kifo chenyewe. Kitendo tu cha kujua dhambi ni kitu gani, kilinifanya nionje kifo, na kwa kweli nilikuwa ninakufa huku nikimlilia Baba ingawa sikusikilizwa. Hapakuwa na yeyote wa kunipatia msaada wowote ili nisife. Nilipiga kelele za kulia kwa viumbe vyote ili wanionee huruma, lakini yote ikawa ni bure tu kiasi kwamba Ubinadamu wangu ulielemea na kuishiwa nguvu hata ukawa unasubiri kupata pigo la mwisho, yaani kifo”.

SAA YA NANE: (*Taz. Uk 51 – 53*). Kutoka Kitabu cha 13:

Tarehe 16 Novemba 1921

Kipindi Chote cha Mateso Yake Yesu Alibaki Amefungwa Kwa Kamba na Minyororo

Luisa anaandika:

Yesu alionekana daima amefungwa kabisa: alifungwa mikononi, miguuni, na kiwiliwili chote. Toka shingoni mwake kulining’inia minyororo miwili ya chuma. Minyororo na kamba vilimbana na kumkaza sana hata Mwili wake mtukufu ulishindwa kujimudu kabisa. Ni jinsi gani hali yake ilivyokuwa ngumu! Hata mawe yangeweza kulia machozi! Na hapo Yesu Chema changu kikuu aliniambia:

“Binti yangu, katika kipindi cha Mateso yangu maumivu yangu mengine yote yalinijia kwa mtindo wa mashindano, yaani yalinifikia kwa zamu za kubadilishana moja baada ya nyingine. Kila umivu linalofuata lilikuwa ni kali zaidi kwani kila mtesaji wangu alitaka ajulikane kuwa yeye ni hodari zaidi katika ukatili kuliko mwenzake. Walifanya zamu wakipokezana kama walinzi. Katika zamu zao hizo hakuna aliyewahi kufungua minyororo au kamba zangu. Ndivyo nilivyokokotwa hadi kufika mlimani Kalvario. Nilikuwa nimefungwa daima! Mara kadhaa waliongeza minyororo na kamba kwani walihofu nisije nikakimbia na pia walilenga kunidhihaki na kunichezea. Maumivu mengi mangapi niliyoyapata! Ni jinsi gani nilivyovurugika, nilivyonyenyekeshwa, nilivyodhalilishwa! Ni mara ngapi nilivyojikwaa na minyororo hiyo hadi kuanguka chini!

Hata hivyo nilijua fika kwamba katika minyororo hiyo kulikuwa fumbo kubwa na fidia kubwa: binadamu anapoanguka katika dhambi mara nyingi hubaki amefungwa na minyororo ya hiyo dhambi

yake. Mimi, ili niweze kuikata hiyo minyororo yake, nimeamua nami niwe nimefungwa na wala nisiachwe kamwe bila minyororo ili niiandae hiyo minyororo yangu iwe tayari kuvunja na kukata minyororo ya dhambi za binadamu”.

SAA YA TISA: (*Taz. Uk 55 – 57*). Kutoka Kitabu cha 11:

Tarehe 22 Januari 1913

**Yesu Anatumbukia Katika Maji Taka ya Kedron Ili Kuwarejeshea Binadamu Vazi la Nuru
Walilopoteza Kwa Dhambi**

Luisa anaandika:

Nilipita kutafakari tukio lile la Yesu Mpendwa wangu aliposukumizwa na adui zake ndani ya mfereji wa maji taka wa Kedron. Yesu Mbarikiwa alionekana katika sura inayoleta huruma kweli. Huku akiwa amelowana kabisa na amejaa taka aliniambia:

“Binti yangu, nilipoiumba roho ya binadamu niliivalisha na kuipamba kwa joho la mwanga na uzuri. Lakini dhambi imeliondoa vazi hilo na badala yake imeweka vazi la giza la uchafu ambalo limepelekea roho iwe inanuka na ilete kichefuchefu na kinyaa. Ili niweze kuliondolea mbali vazi hilo chafu lililoletwa na dhambi juu ya roho, niliruhusu Wayahudi wanitupe katika mfereji huo. Ndanimo nilibakia nimefunikwa na taka kwa ndani na nje ya mwili wangu kwani maji taka haya yaliniingia masikioni, puani na hata mdomoni. Taka ziliniingia na kunifunika hivi kiasi kwamba hata Wayahudi wenyewe waliona kinyaa kunigusa. Ah! Ni jinsi gani lilivyonigharimu Pendo langu kwa viumbe, hadi nafikia kushikwa na kinyaa juu yangu mimi mwenyewe!”

SAA YA KUMI NA TATU: (*Taz. Uk 70 - 73*). Kutoka Kitabu cha 13: *Tarehe 29 Oktoba 1921,*

Yesu Katika Giza la Mahabusu

Luisa anaandika:

Usiku wa leo nimeupitisha kwa kukesha macho na akili yangu ilikuwa inaruka kwenda kwa Yesu Wangu aliyefungwa minyororo ndani ya mahabusu.

“Binti, adui zangu waliniacha mpweke pale katika mahabusu huku nikiwa nimefungwa vibaya sana na kukiwa kweusi mno kwani nilizungukwa na giza nene totoro. Oh! Ni jinsi gani giza na weusi ule ulivyonitesa! Nguo nilizovaa zilikuwa zimelowana na yale maji taka ya mfereji, nilikuwa nasikia kunuka sana, na pia nilisikia harufu chafu ya mahabusu na ya mate na makohoji waliyokuwa wamenitemea usoni na popote. Nywele zangu zilikuwa zimetimka ovyo ovyo, na hapakuwa na mtu wa kunihurumia ili aziondoe machoni pangu na kutoka mdomoni mwangu. Mikono yangu ikiwa imefungwa yote kwa minyororo, na huku nikiwa nimezungukwa na weusi wa giza nene, sikuweza kabisa kujitazama na kuitambua hali yangu! Ah! Masikini Mimi, mateso mno mno na kunyenyekeshwa ajabu! Oh! Ni mambo mangapi yaliyoingia akilini na moyoni mwangu katika hali yangu hiyo ya mateso namna hii ndani ya mahabusu hayo!”

SAA YA KUMI NA TATU: *Kutoka Kitabu cha 12:*

Tarehe 4 Desemba 1918

Yesu Amekubali Kuteseka Gereza ili Atukomboe Na Dhambi

Luisa anaandika:

Usiku huu nimekesha na Yesu pale kwenye Mahabusu. Nilikuwa namwonea huruma, nilimliwaza na nilijibana kwenye magoti yake ili kumwinua na kumtegemeza kidogo. Na Yesu ameniambia:

“Binti yangu, katika Mateso yangu nimependa pia niteseke kifungoni ili nimkomboe kiumbe toka kwenye gereza la dhambi. Oh! Dhambi ni gereza chafu ilioje kwa binadamu! Tamaa zake ni minyororo inayomfunga abaki mtumwa wa kudhalilika. Kifungo changu na minyororo yangu vinamfungulia na kumweka huru tena.

Kwa upande wa roho zile zinazonipenda, gereza langu hubadilika kuwa kifungo cha upendo ambamo wanaweza kukaa salama salimini wakilindwa na kuingwa dhidi ya yeyote na chochote. Hao nilikuwa nawateua ili niwashike kama magereza hai na kama tabernakuli hai ambao wanapasika kuzipasha joto zile tabernakuli za mawe zenye ubaridi. Na zaidi zaidi watakuwa wanapasha joto dhidi ya ubaridi wa roho za viumbe wale ambao huwa wananiua kwa baridi kali na njaa wakati wanaponipokea na kunifungilia ndani yao wenyewe.

Ni kwa hoja hiyo, huwa mara nyingi nayaacha magereza ya tabernakuli na badala yake nakuja ndani ya moyo wako ili hapo nipate kupashwa joto dhidi ya baridi na hivyo mimi mwenyewe nipate kujiburudisha kwa pendo lako. Na pale ninapokuona unakwenda kunitafuta Mimi katika tabernakuli za makanisa, mimi ninakuambia: je wewe siyo yule aliye gereza langu la kweli na upendo kwa ajili yangu? Ebu unitafute ndani ya moyo wako na ukanipende!”.

SAA YA KUMI NA TANO: *(Taz. Uk 78 – 79). Kutoka Kitabu 13: Tarehe 16 Septemba 1921*

Yesu Katika Ikulu ya Herode, Wanamvalisha Kama Kichaa, Wanamdhihaki

Luisa anaandika:

Nilikuwa nikitekeleza Saa ya Mateso wakati Yesu Wangu Mtamu alipokuwa katika ikulu ya Herode huku akiwa amevalishwa kama kichaa na akidhihakiwa. Yesu Wangu Mpendevu, alijitokeza na kujionyesha akaniambia:

“Haikuwa ni wakati ule tu ambapo nilivalishwa vazi kama kichaa, nikazihakiwa na kuchezewa, bali hata leo hii viumbe huendelea kunisababishia maumivu hayo, yaani naendelea kupata dhihaka kutoka kwa aina zote za watu. Iwapo mtu anakwenda kuungama na bila kuzingatia makusudio yake ya kuacha dhambi, hiyo ni dhihaka kwangu. Iwapo Padre anaungamisha, anahubiri, na anaadhimisha Sakramenti wakati maisha yake hayafanani na maneno yake, wala hayaendani na hadhi ya Sakramenti anazoadhimisha, huyo ananichezea na ananifanyia dhihaka kwa kila neno analosema na kwa kila Sakramenti anayoadhimisha. Wakati katika Sakramenti Mimi nilikuwa nawarejeshea uzima mpya, wao lakini wananifanyia utani na dhihaka. Na kwa kuzikufuru Sakramenti wao wananiandalia Mimi lile

vazi la kunivika ukichaa. Iwapo wakubwa wanaoongoza wanaagiza watu walio chini yao watoe sadaka na majitoleo, wakiwaagiza pia fadhila, sala na kujikatalia, wakati viongozi wenyewe wanatafuta maisha ya raha, ya anasa, na ya ubinafsi, hao wananitendea dhihaka nyingi mno. Iwapo viongozi wa kiraia na wa Kanisa wanadai kushika taratibu na sheria huku wenyewe wakiwa ni wahalifu wa kwanza, hizo huwa ni dhahaka wanazonitendea.

Oh! Ni dhihaka ngapi wanazonifanyia! Ni nyingi hivi hata nimechoka! Hasa pale wanapotia sumu ya ubaya chini ya mambo mema. Ah! Ni jinsi gani wanavyonichezea kana kwamba Mimi ni mpira na kigari chao! Lakini muda wowote wa sasa au wa baadaye hukumu ya Haki yangu itawachezea kwa kuwaadhibu vikali. Wewe usali na kunilipa fidia kwa dhihaka hizi ambazo zinanitesa kweli na zinazosababisha hata nisijitambue mimi ni nani.

Baada ya kurejea tena, kwa vile mimi nilikuwa najiyeyusha nafsi yote ndani ya Utashi wa Mungu, (Yesu) aliniambia: “Binti mpenzi sana wa Utashi Wangu, Mimi ninangoja kwa hamu zoezi lako hilo la kujiyeyusha ndani ya Utashi Wangu. Lazima ujue kuwa Mimi nilipokuwa nawaza katika Utashi Wangu, ndivyo nilikuwa nayaingiza mawazo yako ndani ya Utashi Wangu huku nikiyaandalia pia mahali na nafasi. Na Mimi nilipokuwa natenda nilikuwa naingiza matendo yako ndani ya Utashi Wangu. Na ndivyo ilivyokuwa kwa mambo mengine yote yaliyobakia. Sasa lakini, kile nilichotekeleza sikukifanya kwa ajili ya Mimi, kwani sikuwa nina hitaji lolote, bali nilifanya kwa ajili yako. Kwa sababu hiyo, Mimi ninakungojea ndani ya Utashi Wangu ili ufike kuchukua nafasi zako ambazo Ubinadamu Wangu ulikuandalia. Hatimaye uje utekeleze vitendo vyako juu ya vitendo vile vilivyoingizwa na Mimi. Hapo sasa huwa ninaridhika na ninapata furaha timilifu pale ninapokuona wewe ukitenda kile kile nilichofanya Mimi”.

SAA YA KUMI NA TANO: *Kutoka Kitabu cha 14:*

Tarehe 24 Novemba 1922

Yesu Mbele ya Herode

Luisa Anaandika:

Nilikuwa nikiwaza juu ya Yesu Wangu Mtamu alipokuwa anafikishwa mbele ya Herode na nikajisemea mwenyewe: “Imewezekanaje kuwa huyu Yesu Mwema hivi asikubalie kumkarimu kwa kumwambia angalau neno moja na kwa kumwangelia usoni? Nani ajuaye iwapo ule moyo wa uovu usingeweza kuongoka kwa nguvu ya macho yake Yesu?”. Hapo Yesu, huku akijitokeza na kuonekana kwangu, ameniambia:

“Binti yangu, ubaya wake na ugumu wa moyo wake ulikuwa mkubwa hivi kwamba hakustahili nimtazame kabisa, wala kumwambia hata neno moja. Ningefanya hilo ningesababisha na kupelekea awe mbaya zaidi kwani kila neno langu au jicho langu huwa ni kifungo cha ziada kinachojitokeza kati yangu na kiumbe. Kila neno huwa ni muungano mkuu zaidi, huleta ubanano mkali zaidi. Na pale roho inapojisikia inatazamwa, ndipo neema huanza kazi yake”.

SAA YA KUMI NA TANO: *Kutoka Kitabu cha 17:*

Tarehe 1 Julai 1924

Malipizi ya Yesu Anayepigwa Mijeledi

Luisa anaandika:

Nilikuwa nakesha na Yesu katika fumbo la Mateso yake ya kupigwa mijeledi. Alijitokeza na kujionyesha kwangu huku Damu zikitiririka na hapo nikawa nasikia akisema:

“Baba Yangu, nakutolea hii Damu Yangu. Deh! Fanyiza Damu hii ifunike akili zote za viumbe na iyatakase mawazo yao mabaya yote, izime moto wa tamaa zao na badala yake ifanye kuzuke akili zilizo takatifu. Damu hii ifunike macho yao na iwe ni kitambaa kinachoziba muono wao ili hapo pasiingie vionjo vya matamania mabaya na kuzuia wasichafuke katika matope ya ardhini. Hiyo Damu yangu ifunike na kujaza kinywa chao na ilete ganzi kwenye midomo yao mbele ya makufuru, matusi, na maneno yao machafu. Baba Yangu, Damu yangu hiyo ifunike mikono yao na iwalettee hofu na kitisho dhidi ya vitendo vile vingi vichafu. Damu hii izunguke katika Utashi Wetu wa Milele kwa ajili ya kuwafunika wote, kuwatetea na kubaki kuwa silaha ya utetezi kwa viumbe mbele ya mahakama ya Hukumu yetu ya Haki.

SAA YA KUMI NA SABA: *(Taz. Uk 86 – 91). Kutoka Kitabu cha 11: Tarehe 24 Aprili 1915*

Yesu Anavalishwa Taji La Miiba

Luisa anaandika:

Katika hali yangu ya siku zote, nilikuwa ninatafakari juu ya Mateso mengi aliyopata Yesu Mbarikiwa pale alipokuwa amevalishwa taji la miiba. Na Yesu alipojionyesha kwangu aliniambia:

“Binti yangu, maumivu niliyoyapata hayawezi kueleweka kwa akili iliyoumbwa. Mawazo yale yote mabaya ya viumbe ndiyo yalikuwa ni misumari iliyokuwa inapigiliwa ndani ya akili yangu na ndiyo ilinitesa zaidi kuliko miiba ile. Na kati ya mawazo hayo yote hakuna hata moja lililokuwa likinipitia mbali, bali yote niliyaonja kabisa ndani yangu. Sikuonja maumivu ya miiba tu bali hata kishindo, hofu na mshituko kwa kila pigo lililotokana na miiba hiyo ya ndani yangu”

Kwa hiyo nimemwangalia Yesu mpendwa na nimeona Kichwa chake kitakatifu kikiwa kimezungushwa kabisa na taji la miiba ambayo kila moja yao ulikuwa unatoa mionzi ya mwanga kwa kutokea ndani. Mawazo yote ya viumbe yalikuwa ndani ya Yesu na kutoka kwa Yesu mawazo hayo yalikuwa yanapita kwenda kwao viumbe na kishapo yalipita na kurudi tena kwa Yesu na pale yalibakia yakiwa yamefungiliwa pamoja kwa minyororo. Oh! Ni jinsi gani Yesu alivyokuwa anaumia!

SAA YA KUMI NA NANE: (*Taz. Uk 94 – 102*). Kutoka Kitabu cha 15: Tarehe 16 Februari 1923

Roho za Binadamu Zilikuwa Ndiyo Msalaba wa Yesu

Luisa anaandika:

Nilikuwa katika uabudu wangu wa Msulibiwa kadiri ya kawaida yangu na muda huo nilikuwa nimejiachia nafsi yangu yote ndani ya Utashi Wake mpendevu. Kumbe pindi nikifanya hilo, nimeonja mara Yesu Wangu Mpendwa akijimudu na kujitikisa ndani yangu akiniambia:

“Binti yangu, ni mambo mengi yaliyoje ambayo Utashi Wangu wa Kimungu utakujulisha juu ya yale ambayo Ubinadamu Wangu ulitenda ndani ya huo Utashi wa Kimungu! Ubinadamu Wangu, kwa ajili kuweza kutekeleza ukombozi kamili na timilifu, ulipasika kutekeleza zoezi hilo katika mazingira ya umilele. Kwa sababu hiyo palikuwa na ulazima wa kuwepo Utashi wa Milele. Iwapo Utashi wangu wa Kibinadamu usingekuwa umejipatia Utashi wa Milele, vitendo vyangu vyote vingekuwa ni vitendo vyenye mipaka kiidadi, kiuwezo na kimuda. Kumbe lakini, kwa kuwa ndani ya Utashi wa Milele, vitendo hivyo vinapata kuwa na nguvu na uwezo bila kikomo wala mipaka.

Utashi wangu wa Kimungu ulitwaa maumivu yale yote na misalaba yote kutoka katika Ubinadamu. Kishapo ulikuwa unanienezee na kunisambazia hayo yote kwa familia yote ya wanadamu, tangu kwa yule binadamu wa awali hadi kwa yule binadamu atakayekuwa wa mwisho. Na mimi nilikuwa ninavuta, ninavyonza na hatimaye kumezea ndani yangu hayo maumivu ya aina zote na kwa hiyo kila kiumbe kilikuja kuwa ni Msalaba Wangu. Kwa sababu hiyo basi, Msalaba Wangu ukawa mrefu kulingana na utakavyokuwa urefu wa karne zote, na utakuwa na upana unaolingana na upana wa kuenea kwa vizazi vya binadamu. Haukuwa tu ule msalaba mdogo wa Kalvario ambapo Waebrania walinisulibisha. Huo ulikuwa siyo kitu kingine, ila ni picha tu na mfano wa ule Msalaba Mrefu kabisa ambapo Utashi wa Mungu ulinitundika na kunisulibisha.

Wakati kila kiumbe kilipokuwa kinazidi kurefusha na kupanua kimo cha Msalaba Wangu, viumbe hivyo vilikuwa hatimaye vinabaki vimenata palepale msalabani. Na Utashi wa Mungu, kwa tendo la kunilaza Mimi na kunipigilia juu ya Msalaba huo, siyo tu Yeye Mwenyewe alikuwa sasa anautengeneza huo Msalaba Wangu, bali hata alijifanya kuwa sehemu ya huo Msalaba wangu akiunganika pamoja na wale binadamu wote waliokuwa tayari ni sehemu ya huo Msalaba. Ni kwa hoja hiyo basi, nilihitaji mazingira ya Umilele ambamo ndanimo ningepasika kuuweka Msalaba huo. Nafasi iliyopo duniani isingeweza kutosha kuushika Msalaba wangu huo.

Oh! Ni vikubwa namna gani watanipenda viumbe pale watakapofahamu kile ambacho Ubinadamu Wangu umetenda ndani ya Utashi wa Mungu, na watakapofahamu kile ambacho kilinisukuma niteseke kwa ajili ya upendo wangu kwao! Msalaba Wangu haukuwa ni wa mti, hapana: Ulikuwa ni roho za watu. Ni roho hizo ndizo nilikuwa nazisikia zikipiga piga na kupumua toka ndani ya Msalaba ambapo Utashi wa Mungu ulinilaza na hata roho moja haikuweza kunitoroka. Nilikuwa natoa nafasi kwa wote. Na ili nitoe nafasi kwa wote, Utashi wa Mungu ulinivuta kuninyosha na kunipanua mikono yangu na hivyo kuniumiza kwa Mateso mkali sana kiasi kwamba yale Mateso ya Kalvario naweza kusema yalikuwa kwangu ‘kama kitulizo kidogo’ tu.

Basi, ebu fanya haraka ili Utashi Wangu uingize ndani yako kila kitu ambacho Utashi wa Milele ulitenda katika Ubinadamu Wangu. Ufahamu huo utaamsha upendo mwingi na mkuu hata viumbe watauchukua na kuufanya utawale kati yao daima.

SAA YA KUMI NA TISA: (*Taz. Uk 104 -119*).

Sala Kwa Ajili ya Kutegua Hukumu ya Haki ya Mungu

1. Kabla ya kuandika Saa hii ya Mateso ya Bwana Wetu Yesu Kristo, Luisa alitanguliza maneno haya ya sala yake: “Yesu, Mama yangu, njoni wote pamoja nami tuandike. Niadhimisheni mikono yenu mitukufu ili niweze kuandika kile kinachowapendeza Ninyi na kile tu mnachokitaka Ninyi”.
2. Baada ya kukamilika toleo la kwanza la Saa za Mateso ya Bwana Wetu Yesu Kristo, Luisa aliandika kwa Padre wake wa roho Mtakatifu Annibale Maria Di Francia akimweleza kuwa alijisikia kusukumwa kuongeza maneno haya kwenye Saa hii ya Tisa:
 “Katika saa ya kusulibiwa, kuelekea mwishoni, pale ambapo tumesema ‘wakati alipokuwa juu msalabani roho yake ilikuwa mbinguni pamoja na Baba Yake Mtukufu, mimi ninamfuata kwa mawazo hadi mbinguni na pamoja Naye tunajaribu kutegua Haki ya Mungu ambayo imetikiswa na kuvurugika mno katika nyakati hizi. Katika kutekeleza zoezi hilo ninatumia muda wa karibu nusu saa hivi. Naonja Yesu Bwana wangu ananisukuma niandike juu ya zoezi hili.....”

Hapa chini sasa Luisa anatoa maelezo kwa jambo lililoongezwa:

“Katika Saa hii, Yesu, akiwa Msalabani, anajumlisha maishaa yake yote, kuanzia dakika ile ya kwanza alipotungwa mimba hadi pale alipotoa pumzi yake ya mwisho. Anatimiliza yote huku akimshukuru Mungu Baba kwa yale mema yote aliyowatendea viumbe na hata kwa Mateso yenyewe aliyopata Yeye. Anamtukuza, anamwomba, anamlipa fidia. Kifupi, anatekeleza kwa tendo moja yale yote aliyofanya katika maisha yake yote. Sasa, roho (mimi Luisa) katika kujibu na kurudia kile anachofanya Yesu, ninaanza na mimi tangu pale Yesu alipotungwa mimba hadi dakika yake ya mwisho, kumshukuru Yesu kwa yote aliyonitendea. Kwa vile ufedhuli wa viumbe kwa ujumla ni mkubwa kweli, na mbaya zaidi kwamba ufedhuli huo hujitokeza hata katika dakika ile viumbe wanapopokea fadhila mbalimbali bila kutoa shukrani yoyote, mimi Luisa ninajaribu sasa kutekeleza tendo lote hilo la shukrani kwa utimilifu wote. Hii ndiyo hoja kwa nini katika Saa hii ninarudia maisha yote ya Yesu Kristo na ninajaribu hapa kuunganisha aina zote za fidia. Kati ya roho zote za viumbe, je hapatatokea kuwa na angalau roho mojawapo atakayependa kuonyesha ushujaa huo wa pendo kwa Yesu?”.

Katika Barua nyingine ya Tarehe 7 Oktoba 1915 Luisa anaendelea kusema:

“Lengo la Saa kama hii ni lile la kutegua hukumu ya Haki ya Mungu. Wakati katika Saa nyingine lengo limekuwa ni kulipa fidia, kutukuza na kuomba radhi nk. Katika Saa hii mtu anategua Haki ya Mungu na anaituliza. Mtu anajiinua na kunyanyukia juu na kusimama kati ya mbingu na dunia sawa kama alivyofanya Yesu Kristo. Anaiangalia hukumu ya Haki ya Mungu na kujaribu kuituliza. Papo hapo, anapotazama chini, anakiangalia kiumbe na kujaribu kukiongoza na kukivutia kifike kifuani pake ili aanze kutenda kile anachotenda Yesu. Tendo hilo huleta raha kubwa sana ya kimungu kiasi kwamba Yesu huwa anamngojea mtu huyo kwa hamu sana. Ni kwa vile anajisikia kuburudika anapoonza mtu amejiinua toka ardhini akiwa na hamu sana ya kuwaokoa ndugu zake. Pindi hukumu ya Haki yake Mungu inapowaka moto, huwa inatafuta mahali pa kukimbilia au pa kutua. Hatafuta fidia ndani ya mtu huyo ambaye naye anatamani kutwaa maumivu ya Yesu na kuyafanya yawe ya kwake. Mtu huyo pia hutamani kuzitwaa zile roho za watu na kuzifanya ziwe za kwake. Hatimaye huyo huyo mtu humwalika na kumwomba Yesu na kumlazimisha aache kukiangamiza kizazi masikini cha binadamu”.



SHAIRI LA MSALABA

MSALABA uliokutesa Wewe ulinikomboa kutoka utumwa wa shetani, na uliniolesha kwa Umungu kwa kifungo kisichokoma.

MSALABA una rutuba na unanizalishia neema,

MSALABA ni nuru na unanionya, unanitahadharisha na kunirekebisha na yapitayo na hunifunulia ya milele,

MSALABA ni moto unaoteketezea majivuni chochote kisicho cha Mungu hadi kusafisha moyo wangu kwa kutupilia mbali hata ule unyasi unaoweza ukawepo,

MSALABA ni sarafu ya thamani kuu isiyokadirika ambayo, Mchumba Mtakatifu, nikiipata fursa ya kuimiliki, nitatajirika kwa sarafu za umilele, hadi nitakuwa tajiri kupita wote pale paradisini kwani sarafu inayotembea mbinguni ni ule Msalaba uliobebwa duniani,

MSALABA halafu, siyo tu unaniwezesha kujijua mimi mwenyewe, bali unanipa pia ufahamu juu ya Mungu,

MSALABA unapandikiza ndani yangu fadhila zote,

MSALABA ni Kiti Ikulu ya Hekima Kuu isiyoumbwa, inifundishayo kweli zilizoinuka kabisa zilizo safi, sizizochanganywa na chochote, za juu kupita chochote,

MSALABA kwa peke yake utanifunulia mafumbo yaliyofichikana kabisa, vitu vilivyoandaliwa na kuungwa zaidi, ukamilifu timilifu kabisa, chochote kile kilichokuwa kimefichikana kwa wasomi na wenye hekima wa ulimwengu huu,

MSALABA ni maji yaletayo mema, ambayo siyo tu yatanitakasa bali yataniingizia hata lishe kwa ajili ya fadhila, kwa kuzifanya zikue na kuongezeka na maji hayo yataniacha tu siku nitakapopelekwa na kuingizwa katika maisha ya milele,

MSALABA ni umande wa mbinguni unaonihifadhia na kunipambia ua langu la lilia la usafi wa moyo,

MSALABA ni lishe ya matumaini,

MSALABA ni tochi ya ulimi wa moto wa imani inayotenda kazi,

MSALABA ni ukuni uliokauka unaotunza daima na kuendeleza moto uwakao wa upendo,

MSALABA ni ukuni mkavu ambao unapowashwa hufukuza na kufifisha mioshi yote ya majivuno na malimbwende na badala yake unatengeneza rohoni moto wa urujuani wa unyenyekevu,

MSALABA ni silaha iliyo na uwezo mkuu na ukali unaotisha mashetani na unaonitetea mimi dhidi ya mishale yao yote. Roho inayomiliki **MSALABA** inaonewa wivu na inawastaajabisha hata Malaika na Watakatifu na hupandisha hasira na chuki kati ya mashetani,

MSALABA ni paradisi yangu hapa duniani; kama katika paradisi ya Wenyeheri kuna mambo ya kufurahia, katika paradiso ya hapa duniani kuna mambo ya mateso.

MSALABA ni mnyororo wa dhahabu iliyotakasika kabisa inayoniunganisha na Wewe Chema Changu wa Juu, inayotengeneza muunganiko wa upendo wa kina kabisa unaowezekana kiasi kwamba unafifisha nafsi yangu, kwa kunigeuza niwe Wewe na niishi Uhai ule ule wa kwako.

SAA YA ISHIRINI: (*Taz. Uk 121 – 125*). Toka Kitabu cha 6:


Tarehe 20 Mei 1905

Yesu Anaonja Raha Pale Msalabani

Luisa anaandika:

Leo asubuhi, nilikuwa natafakari juu ya wakati ule Yesu Mbarikiwa alipokuwa amebaki amefungwa pale Msalabani. Nilisema hivi moyoni mwangu: “Ah! Bwana, ni jinsi gani ulivyokuwa umechomwa na kutobolewa mpaka ndani kwa mateso haya makali sana, na ni jinsi gani moyo wako ulipasika kubaki umeumia na kupondeka!”. Wakati nikiwa katika dakika hiyo ya giza, Yesu amekuja na kuniambia: “Binti yangu Mimi sikuwa nikijali sana Mateso hayo yangu, bali nilijali zaidi lengo na hatma ya maumivu yangu hayo. Kwa vile katika maumivu yangu nilikuwa natambua kuwa Utashi wa Baba unatimizwa, ni kweli nilikuwa nateswa lakini katika kuteswa kwangu huko nilikuwa napata raha iliyo tamu kabisa kwa vile kutekeleza Utashi wa Mungu huleta faida hiyo. Pindi mtu anapoteswa ndipo hupata raha iliyo nzuri kupita raha nyingine. Kama mtu anapata raha wakati raha hiyo haikubaliki na Mungu, ndani ya raha hiyo mtu atapata mateso yatakayomuumiza zaidi kabisa. Kwa kweli, kadiri jinsi nilivyokuwa nakaribia mwisho wa maumivu yangu, nilikuwa naota ndoto za kutimiza Utashi wa Baba katika mambo yote! Ndipo nilionja kufurahia zaidi na raha yangu ilikuwa inazidi kuwa nzuri sana. Oh! Ni jinsi gani imekuwa tofauti na mambo ya roho za watu! Kama wanateswa au kama wanatenda lolote, wao huwa hawatarajii wala hawangojei kupata tunda litokanalo na mateso yao hayo, na wala hawatarajii kutimiza Utashi wa Mungu. Wao huzama tu katika kile kitu wanachokitenda. Kwa vile hawaoni manufaa wanayoweza kuyavuna, wala hawaioni ile raha tamu inayoletwa na Utashi wa Mungu, wao wanabaki wakiendelea na uchovu, kukata tamaa, na kuteseka. Halafu haraka iwezekanavyo wanajaribu kutoroka mateso hayo na matendo hayo, huku wakitarajia kupata raha, kumbe lakini huwa wanaendelea kuteseka zaidi kuliko kabla yake”.

SAA YA ISHIRINI NA MBILI: (*Taz. Uk 135 – 139*). Kutoka Kitabu cha 9: *Tarehe 4 Julai 1910*



Mateso Makali ya Msalabani

Yesu anamwambia Luisa:

Iwapo Mateso makali ya Bustanini yalikuwa kwa namna ya pekee kwa ajili ya wale walio mahututi, yale Mateso makali ya msalabani yalikuwa ni kwa ajili ya msaada wa dakika ya mwisho kabisa, kwa ajili ya pumzi ya mwisho. Yote mawili ni Mateso makali, lakini kila Teso hutofautiana na lingine. Teso la Bustanini, lilijaa uchungu, hofu, mahangaiko, na kutishika. Teso la msalabani lilijaa amani, utulivu usiovurugwa na lolote. Na kama nililalamika: ‘Naona Kiu’ ni kwa vile kilikuwa ni kiu kisichozimika cha kutamani watu wote waweze kukata roho ndani ya Pumzi yangu ya mwisho. Na pale nilipoona wengi wanahama toka ndani ya Pumzi Yangu, kwa

maumivu makali niliyopata, nililia kwa sauti kubwa: ‘Naona kiu!’. Na kilio hicho ‘Naona Kiu!’ kiliendelea bado kulia na kusikika kwa watu wote na kwa kila mtu binafsi. Husikika kama kikengele cha mlangoni pa kila moyo. ‘Naona Kiu juu yako ewe roho! Deh, usitoroke toka kwangu, bali ingia ndani yangu na hapo ukapumue pamoja Nami!’.

SAA YA ISHIRINI NA TATU: (Taz. Uk 142 – 144). Kutoka Kitabu cha 10: Tarehe 21 Juni 1911

Yesu Amekufa, Ameshushwa, Amewekwa Mikononi Mwa Mamae

Luisa anaandika:

Nilikuwa nikitafakari juu ya Mama wa mbinguni aliposhika mikononi mwake Maiti ya Yesu Wangu Mpendwa wa daima; alikuwa anafanya kitu gani na alimshughulikia Yesu kwa namna gani? Ndipo nilionja mwanga mkubwa ukiingia ndani yangu ukiwa unaendana na sauti iliyosema:

“Binti yangu, upendo ulikuwa unajitikisa kwa nguvu sana ndani ya Mama yangu. Upendo ulikuwa unammaliza Mama ndani yangu, ndani ya madonda yangu, ndani ya Damu yangu na ndani ya kifo changu chenyewe. Na upendo huo ulimfanya afe ndani ya Pendo la kwangu. Pendo langu likalimeza pendo lile la Mama na likameza pia Mama mwenyewe mzima. Kishapo Pendo langu likamfanya Mama afufuke katika Upendo mpya, yaani akawa ni Pendo la kwangu.

Kwa vile pendo lake lilikuwa linamuua, Pendo la kwangu likawa linamfufua katika Uhai mpya uliopo kikamilifu ndani yangu, Uhai wenye utakatifu mkuu zaidi, na wote ukiwa ni Uhai wa kimungu. Kwa sababu hiyo hakuna utakatifu wowote kama roho haifariki ndani yangu Mimi. Na hakuna uzima wa kweli kama uzima huo haujimalizi wote ndani ya Pendo langu”.



SAA YA ISHIRINI NA NNE: (*Taz. Uk 147 – 153*). Kutoka Kitabu cha 36: Tarehe 20 Aprili 1938

Ufufuko Halisi

Luisa anaandika:

Nilikuwa naendelea na mzunguko wangu wa kutafakari mambo yote aliyotenda Bwana Wetu hapa duniani na nikafikia kusimama kwenye tendo la Ufufuko wake. Ni Ushindi mkuu ulioje! Utukufu ulioje! Mbingu ilipinduka kutazama duniani ili kuwa mmojawapo wa wale wanaostaajabia utukufu mkuu kama huo! Na hapo Yesu wangu mpendwa aliendelea na maneno yake:

“Binti yangu, katika Ufufuko wangu, iliwekwa ile haki ya viumbe vyote ya kufufuka ndani yangu na kuingia katika uzima mpya. Ilikuwa ni uthibitisho na mhuri wa uhai wangu wote, wa kazi zangu zote, na wa maneno yangu yote. Ilikuwa uthibitisho pia kama kweli nilikuwa nimekuja duniani kwa ajili ya kujitoa mwenyewe kwa ajili ya watu wote na kwa ajili ya kila mtu ili niwe uzima ule utakaokuwa ni mali yao. Ufufuko wangu ulikuwa ndio ushindi mkuu kwa watu wote. Na ni ushindi mpya ambao wote wataupata kutoka kwa yule aliyekufa kwa ajili ya watu wote ili kuwapatia uzima na kuwafanya wafufuke ndani ya Ufufuko wenyewe wa kwangu.

Je unataka kujua nini maana ya ufufuko wa kiumbe? Siyo katika siku za mwisho bali ni wakati huu anapoishi bado hapa duniani. Yule anayeishi katika Utashi Wangu huyo anafufuka katika nuru na anaweza kusema: ‘Giza langu limekwisha’. Anafufuka katika Pendo la Muumba Wake kwa jinsi kwamba sasa kwake baridi haipo tena, wala theluji hazipo, bali badala yake anaonja daima tabasamu ya ujio wa kiangazi cha mbinguni. Anafufukia katika utakatifu ambao unafukuza na kukimbiza madhaifu yote, machungu, na matamaa mbalimbali. Anafufukia mambo yote yaliyo ni mbingu. Anapoangalia dunia, mbingu, na jua, huziangalia tu kwa ajili ya kuziona kazi za Muumba wake, na kwa ajili ya kupata fursa ya kutangaza utukufu wa Muumba, na kueleza historia ndefu ya Upendo wake.

Kwa hiyo, yule anayeishi katika Utashi Wangu anaweza akasema kama Malaika alivyosema kwa wale wanawake wachaji waliokuwa wakielekea kaburini: ‘Amefufuka, hayupo hapa tena’. Anayeishi katika Utashi Wangu, naye atasema hivyo hivyo: ‘Utashi wangu haupo tena pamoja nami, ila umefufuka katika ‘Fiat’. Na endapo mazingira ya maisha, nafasi mbalimbali na fursa, na maumivu yanamzingira kiumbe ili kutaka kuupata Utashi wake, yeye anaweza akajibu: ‘Utashi wangu umefufuka, sinao tena katika mamlaka yangu, isipokuwa nimebadilisha na Utashi wa Mungu, ambao nuru yake nataka niilete na kuizungusha juu ya kila kitu kinachonizingira mimi sasa, yaani izunguke juu ya mazingira, na maumivu, ili kuleta ushindi mwingi wa kimungu’.

Yule anayeishi katika Utashi Wetu ataupata uzima ndani ya matendo ya Yesu Wake. Na kama ilivyo kawaida, atauona pia Utashi Wetu unaotenda kazi, unaoshinda, na unaotukuka. Na huo Utashi Wetu unatuletea Utukufu ule ambao hata mbingu haiwezi kuushika. Kwa hiyo basi, wewe uishi daima ndani ya Utashi Wetu na kamwe usithubutu kutoka nje iwapo unataka kuwa ushindi wetu na utukufu wetu”.

